

# «Dar dapli profil a nus»

Partida burgais-democratica dal Grischun

DA GION NUTEGN STGIER / ANR

■ **Naginas surpraisas tar la radunanza da nominaziun per las elecziuns dal cussegl naziunal. Duri Campell, l'actual president dal cussegl grond, figurescha sin plaz in da la glista da la pbd grischuna. La finamira saja da defender il post da cusseglier naziunal Hansjörg Hassler.** 110 delegads èn vegnids per nominar las personas per las tschernas naziunales da quest onn. A l'entschatta da la radunanza ha *Andreas Felix*, il president da la pbd, gratulà a cussegliera governativa *Barbara Janom Steiner* per sia elecziun onuraivla en il cussegl da la Banca Naziunala Svizra. Gratulaziuns ha el er drizzà ad *Andy Kollegger* per sia elecziun sco president da l'Uniun chantunala da musica dal Grischun. Tema central da la saira è stada la nominaziun dals candidats per defender il sez da cusseglier naziunal *Hansjörg Hassler* che sa retira suenter 16 onns. Già da decider han ils preschents lura er la successiun dals nums da la glista per las tschernas naziunales en bun sis mais.

## Nagin ha prendì il pled

La direcziun da la partida aveva già fixà la successiun dals nums per las elecziuns dal cussegl naziunal ed ils delegads han sustegnì la proposta da la direcziun. Nagin ha prendì il pled uschia che quel tractandum è stà be curt e bun. Sin piazza in da la glista è, sco supponì, *Duri Campell* e sin piazza dus suonda *Elisabeth Mani-Heldstab*. *Andreas Felix*, il president da la pbd, è sco terz sin la glista, quart è *Urs Hardegger* e sin piazza tschintg figurescha il selvicultur *Daniel Buchli*. Quai che pertutga ina eventuala colliaziun da glistas cun autras partidas giascha en la cumpetenzza da la direcziun da la pbd,



La candidata ed ils quatter candidats da la pbd grischuna per las elecziuns dal cussegl naziunal: Urs Hardegger, Duri Campell, Andreas Felix, Elisabeth Mani-Heldstab e Daniel Buchli (da san.).

FOTO G. N. STGIER

quai han decis ils delegadas senza in sulet votum.

## Prioritads e l'avegnir da la pbd svizra?

Daniel Buchli vulesc surtut a Berna promover l'economia dal gaud e dal lain e lura er tematisar ils privels da la natira che s'augmentan adina dapli. La pbd saja bain anc «pitschna e fina», ella haja en sis retschas personalitads e sin fundament da l'istorgia sajan tuts curaschus e plain speranza per il futur. La politica agrara, il turissem e lura er la chatscha, quai sajan ses temas preferids e temas che sajan da tractar a Berna, menziuna Duri Campell,

il nr. 1 da la pbd grischuna per las elecziuns dal cussegl naziunal. «Nus avain da crair en la pbd, nus avain da lavurar e cunzunt anc dar dapli profil a nus e lura er trair tuts en ina direcziun», ha el ditg.

## Speranzas en auters chantuns

Ils resultats tar las elecziuns naziunales sajan bain da gronda impurtanza per l'avegnir da la pbd, accentuescha *Andreas Felix*. El è dentant da buna speranza che sia partida haja er suenter las elecziuns naziunales il dumber da fracziun. En ils chantuns Son Gagl, Turgovia e Vad haja la pbd bunas schanzas da far mintgamai in sez. L'economia, la furmaziun e la politica da

traffich e d'energia sajan ses temas preferids. Urs Hardegger less cunzunt s'engaschar a Berna per meglras cundiziuns en il sector da sanadad. Il deputà da Seewis è persvas che la pbd sappia tegnair la fermezza da fracziun e cun continuar cun buna lavur sco fin ussa haja ella er in bun avegnir. Professiun e famiglia, quai sajan temas impurtants per ella, ha ditg *Elisabeth Mani-Heldstab*. Dumondas da la vegliadetgna e lura er da la furmaziun, quai sajan dus ulteriurs temas che interesschian ella. La deputada vesa in bun avegnir per la pbd che vegnia segir ad esser represchentada vinavant a Berna cun almain tschintg personas.